

# МИЛЛАТ ТУШУНЧАСИНИНГ ТАРИХИЙ ТАҲЛИЛИ

<http://dx.doi.org/10.26739/2181-9599-2019-3-13>

Алимуҳамедова Нодира Ядгаровна,

Тошкент ирригация ва қишлоқ хўжалигини механизациялаш  
муҳандислари институти катта ўқитувчisi

## АННОТАЦИЯ

Ушбу мақолада “этнос”, “миллат”, “халқ” тушунчаларининг тарихий, умумиллмий ва фалсафий талқинлари, ижтимоий-сиёсий, фалсафий концепциялар ривожи, этномаданий плюрализмнинг ижтимоий-сиёсий мазмуни ҳамда уларни туркумлашириш тамойиллари ижтимоий-фалсафий нуқтаи назардан тадқиқ этилган.

**Калит сўзлар:** этнос, миллат, халқ, жамият, давлат, ижтимоий гуманитар фанлар, миллий идентификация жараёни, этномиллий концепциялар, примордиализм, тарихий-этнография.

## ИСТОРИЧЕСКИЙ АНАЛИЗ ПОНЯТИЕ НАЦИЙ

Алимуҳамедова Нодира Ядгаровна,

старший преподаватель Ташкентского института инженеров  
ирригации и механизации сельского хозяйства

## АННОТАЦИЯ

Вданной статье анализируются исторические и философские трактовки понятий «этнос», «народ», «национа», развитие общественно-политических, философских концепций, социально-политическая сущность этнополитического плюрализма и принципы их классификации с точки зрения социальной философии.

**Ключевые слова:** этнос, национальность, общество, государство, социально-гуманитарные науки, процесс национальной идентификации, этнические концепции, примордиализм, историческая этнография.

## HISTORICAL ANALYSIS CONCEPT OF NATIONS

Alimukhamedova Nodira,

Head Teacher of the Tashkent Institute of  
Irrigation and Agricultural Mechanization Engineers

## ANNOTATION

This article analyzes the historical and philosophical interpretations of the concept “ethnos”, “people”, “nation”, the development of sociopolitical and philosophical concepts, the sociopolitical essence of ethno-political pluralism and the principles of their

classification from the point of view of social philosophy.

**Key words:** ethnos, nationality, society, state, social and humanitarian sciences, process of national identification, ethnic concepts, primordialism, historical ethnography.

Мустақил давлатлар ижтимоий гуманитар фанларида бугун “миллат” тушунчаси таъриф-таснифига катта эътибор берилишининг сабаби бор: ушбу ҳолат кейинги ўттиз йиллик вақт ичида собиқ совет иттифоқи худудида рўй берган ижтимоий-иқтисодий ва сиёсий вазият, мустақилликка эга бўлган собиқ совет иттифоқи давлатларининг миллий идентификация жараёни билан белгиланган.

Дунё олимлари томонидан ҳозирги давргача этнос ва миллат тушунчаларининг методологик асосларига оид кўплаб назариялар ва концепциялар яратилган бўлса-да, уларни этник феноменни англаш нуқтаи назардан уч гуруҳга – примордиалистик, инструменталистик ва конструктив назариялар асосида умумийлашириш мумкин.

Бунда биз примордиалистик концепцияни доминант сифатида олиб ўрганишишимиз мақсадга мувофиқдир. Чунки бу концепция этнос ва миллат тушунчаларининг субстанционал ва эссенциалистик ёки тарихий илдизларини таҳлил қилишида устувор аҳамият касб этади. Этномиллий концепциялар орасидаги примордиализм (инглиз тилидаги “primordial – “бошланғич”, “дастлабки”, “азалий” деган сўздан олинган) парадигмада этнос ва миллат идентификацияси табиатда ёки жамиятда объектив асосга эга бўлган аниқ феноменлар таҳлилига алоҳида эътибор қаратилади. Примордиализм оқими икки йўналишга бўлинади: тарихий-эволюцион ва социобиологик йўналиш. Бунда этнос (юонон. ethos – гуруҳ, қабила, ҳалқ) ижтимоий-тарихий ва маданий жараёнлар натижасида шаклланган ижтимоий гуруҳининг ўзига хос тури ёки уруғ, қабила, элат ва миллат шаклларида намоён бўлувчи феномен сифатида талқин қилинади. Мазкур тушунчани илмий муомалага 1921-1923 йилларда С.М.Широкогоров киритган. У этносни инсоният локал гуруҳи мавжудлигининг асосий шакли деб ҳисоблаган. Унинг асосий белгилари - “келиб чиқиш, урфодатлар, тил ва турмуш тарзи бирлиги” [1] деб талқин қилган.

Миллат кишиларнинг жисп тарихий бирлиги, умумиқтисодий турмуш, тил, ҳудуд бирлиги, маданият, онг, рухият уйғунлиги ва муштаралиги демакдир [2]. Миллат шаклланишидан аввал ижтимоий тараққиётнинг этнос (ҳалқ) шакли маҷуд бўлиб, ҳалқларнинг келиб чиқиш тарихини ўрганишда этник бирлик атамаси ҳам ишлатилган.

Миллат шаклланишининг ижтимоий-фалсафий моҳиятини англаш, тадқиқ қилиш учун уларнинг субстанционал асоси бўлган “этнос” ва “миллат” тушунчаларини, уларнинг генезисини ўрганиш лозим. “Этнос” тушунчаси юонон тилидан олинган бўлиб, унинг этикологик маъноси ҳалқ, қабила, тўда, кишилар гуруҳи деган маъноларни англатади. Сиёсатшунослик фанлари доктори Н.Маманазаров ёзганидек, бу термин (яъни “демос”) кишилар гуруҳининг муайян ижтимоий-сиёсий жараёнларда актив қатнашуви қисмини англатса,

“этнос” термини муайян жой, яни худудда яшовчи халқнинг локал гурухини англатади. Ҳозирги пайтда “этнос” термини фақатгина илмий доира ва илмий адабиётлардагина қўлланса, “халқ” термини эса, кундалик ҳаётнинг барча ижтимоий-сиёсий, маданий, иқтисодий ва маънавий жабҳаларида актив қўлланилади. Шу жиҳатдан ҳам “этнос” ва “халқ” тушунчалари маълум маънода бир-бирига яқин бўлса-да, аммо мазмун ва моҳият жиҳатидан бир-биридан фарқ қиласи [3].

Умуман илмий адабиётларда “этнос” тушунчаси ва ҳодисасига ўттизга яқин таърифлар учраса-да, уларда маълум бир яқинлик, муштараклик мавжуд. Яъни, “этнос – бу бир тилда сўзлашувчи, ўзларининг бир хил келиб чиқиши ва муштарак шаклланиш жараёнини тан оловчи, бошқа халқлардан фарқ этувчи қатор урф-одат ва анъаналарга эга бўлган кишилар гуруҳидир” [4]. Бизнинг назаримизда этнос деганда инсонларнинг маълум ҳудудда узоқ муддат биргаликда истиқомат қилиши, умумий тил, маданият ва ўзини ўзи англаш орқали бирлашган кишилар гуруҳи тушунилади. Шунингдек, этнос деганда қабилавий қариндошлиқ, ягона майший маданият (мулоқот тили, эътиқод обьекти, кундалик юриш-туриш меъёрлари ҳам шунга киради), умумий истиқомат маконининг (ландшафтни қамраб оловчи) мавжудлиги ёхуд мавжуд бўлганлиги ҳамда бошқа этносларга нисбатан ўзининг ягоналигини англаш ва қайд қилинган номга эгалик (этноним) асосида шаклланган ижтимоий бирлик ҳам назарда тутилади. Айрим этносларни бир-биридан фарқловчи муҳим белгиси уларнинг ўзига хос маданий хусусиятлари орқали намоён бўлади. Бу хусусиятлар ҳар бир халқнинг тарихий-маданий ривожланиши жараёнида шаклланади ва авлоддан авлодга мерос бўлиб ўтади. Фанда бу жараён “этник анъаналар” ёхуд “этник ворислик” деб аталади. Бундай анъаналар ҳар бир халқнинг ижтимоий-иқтисодий турмуши ҳамда у яшаётган табиий географик муҳит билан боғлиқ ҳолда шаклланади. Факат алоҳида халқлар эмас, балки уларнинг шаклланиш жараёнида иштирок этган қариндош гуруҳлар ҳам этнос деб ҳам аталади. Бизнингча этнос бу бир тилда гапиравчилар, келиб чиқишига кўра бир хил бўлган, ўзига хос урф-одатлар комплекси, ҳаёт тарзига эга бўлган одамлар уюшмасидир.

Миллат шаклланиши муаммосига турли оқим вакиллари турлича ёндашадилар. Социобиологик йўналиш вакилларининг таълимотлари ўзига хослиги билан ажralиб туради. Ушбу оқим вакили бўлмиш С.М.Широкогоров фикрича, этник тасниф учун аниқ мезонлар йўқ. Шунга қарамай у этносларни биологик хусусиятидан келиб чиқсан ҳолда, уларнинг моҳиятини белгиловчи бир неча мезонни ишлаб чиқди. С.М. Широкогоров «этносларни яратилиши, ривожи ва интиҳоси жараёнлари инсониятга тур сифатида мавжуд бўлиш имкониятини беради» [5], деб таъкидлайди.

Примордиализмнинг социобиологик йўналиши вакили америкалик социолог ва социал антрополог, Вашингтон университетининг профессори Ван Ден Берге **ПьерЛуи** миллатнинг биоэнергетик табиати ҳақида таълимот яратган. Унинг фикрича этносларнинг мавжудлиги инсонларнинг биологик моҳиятидан келиб чиқсан заруриятдир [6]. Инсонлар хулқ-атворини этология ва зоопсихологиянинг

айрим қоидалари асосида тушунтирар экан, ижтимоий ҳаётдаги барча муҳим ҳодисалар – ижтимоий тенгсизликлар, синфий кураш, харбий тўқнашувларнинг сабаби инсон табиатининг биологик хусусиятларига боғлиқ,[7] деб таъкидлайди. Олим фикрича оила, сиёsat, давлат каби турли ижтимоий институтлар гоминидларнинг биологик эволюциясининг натижасидир. Ижтимоий ҳодисаларни ўрганишда социо-биологик ёндашув ижтимоий оламни “ноафсоналаштириш” имконини яратади, жамият ҳаётининг ҳақиқий манбаларини топиб, тушунтиришга ёрдам беради, деб таъкидлайди **ВанденБерге**. Аслида унинг таълимотида табиий омилларнинг аҳамиятиошириб кўрсатилади ва аксинча ижтимоий омилларга деярли аҳамияти йўқ, деб қаралади. Олимга инсоният тарихига фаталистик назар билан қараш хосдир: унинг фикрича, оламни яхшилик томон ўзгартириш сари қилинган ҳар қандай уринишлар муваффақиятсизликка дучор бўлади, чунки мавжуд ижтимоий тартиб биологик қонуниятлар асосида олдиндан белгиланган, бу инсониятнинг қисматидир.

Рус олими Л.Н. Гумилев ҳам биологик примордиализмнинг варианти сифатида «этник майдон» гипотезасини (пассионар назария) илгари сурди. Л.Н. Гумилев фикрича «Этнос – кишиларнинг табиий равишда шаклланган уюшмаси бўлиб, аъзолари ўзига хос хулқ-атвор стериотипларига эга. Улар ўзини аналогик уюшмаларга қарама-қарши қўядилар, бу қарама-қаршилик эса умумий комплиментарлик – этногурухлардаги ўзаро ҳурмат-эътибор ҳисси билан белгиланади» [8]. Комплиментарлик асосида эса «этник майдон» ётади. Л.Н. Гумелёвнинг таъкидлашича этнослар яхлит система сифатида мавжуд бўлиб, этник тизим – суперэтнослар таркибига киради, ўз ўрнида этноснинг элементлари – субэтнослар, конвикциялар, консорцлардан иборатдир.

Унинг таълимотича этносларнинг табиий-биологик хусусияти улар биоорганик оламнинг асосий таркибий қисми, маълум бир географик ва иқлим шароитлари ҳосиласи эканлиги билан белгиланади. *Л.Н. Гумилев бу тезисни асосий постулат сифатида ўзининг биологик концепциясининг асосига қўяди*.

Этнос – биринчи навбатда биосферанинг феномени. «Биз, – деб ёзади у, – қай даражада ижтимоий тараққиёт соҳиби бўлсан, шу даражада ер биосферасининг натижасимиз» [9]. Маданиятниг вужудга келиши, ривожи ва аҳамияти иккинчи даражалидир. Муаллифнинг фикрича этник бирликларнинг пайдо бўлиши, ривожи ва тараққиётининг асосий сабабчилари этнос таркибидаги «*пассионарлар*», *яъни сергайрат, қобилиятли, истеъдотли ва ўз халқи учун жонини фидо қилувчи инсонлардир*. Этнослар инқирозининг сабабчилари эса «*субпассионарлар*», яъни масъулият ва жавобгарлик ҳисси бегона бўлган бекорчилар, ялқовлар, қашшоқлар, ялангоёқлар, дайдилар, жиноятчилар ва бефарқ одамлар. 1200–1500 йил давомида пассионарлар сонини камайиши, ва аксинча *субпассионарлар* сонини ортиб бориши этносларни ҳалокатга олиб келади.

Л.Н. Гумилев «Этносфера. Инсонлар тарихи ва табиат тарихи» номли китобида этносларнинг шаклланиш жараёнларига тўхталиб ўтади. Ер биосфераси – планетализмнинг қобиқларидан биридир. Одамлар биосфера таркиби – антропосферага кирсаларда, уларни бир бутун яхлитлик сифатида қабул қила

олмаймиз. *Антропосфера* халқ, ёки миллат, ёки этнос деб номланувчи турли-туман бирликлардан иборат. Л.Н.Гумилев этнос хусусиятларини таъриф-таснифини олти пунктга бўлган, уларни қуида келтирамиз:

1. Этнос – тарихий даврда тарақкий этувчи тизим, ўз ибтидоси ва интиҳосига эга; яъни этногенез – дисcret (узликли) жараёндир.

2. Этносларни бир-биридан фарқловчи умумий мезон – хулқ-автор *стереотипи* – ўзига хос хулқ, феъл-автор бўлиб, у наслдан наслга генетик йўл билан эмас, балки шартли рефлекслар асосида шаклланган наслдан наслга ўтувчи сигналлар механизми ёрдамида ўтади.

3. Этносдаги тизимли алоқалар «ўзимники» ва «бегона»(«биз» ва «улар»)ларни ҳис этиш, ажратиш асосида амалга ошади. Алоқалар руҳий-эмоционал асосда амалга оширилар экан, этнос ижтимоий бирлик бўла олмайди, у табиий равишда вужудга келган, табиатнинг бир бўлаги, табиий бирлик сифатида қабул қилиниши ва табиий фанлар услубларидан фойдаланиб тадқиқ этилиши даркор [10].

Бугунги кунда социал антропологияда этник мансубликнинг биологик асосини (“ген”), асл этник фундаментни топишга уринишлар давом этмоқда. Миллий мансубликнинг генини топишга уринишлар натижасиз бўлганлиги, миллатнинг ижтимоий моҳияти бирламчи эканлигини яна бир бор исботлайди. Л.Н.Гумилевнинг фикрича:

4. *Этносдаги тизимли алоқалар ҳамда ундаги бирликни биосферанинг тирик моддалар геобиохимик энергияси сақлаб туради.*

*Муаллиф таъкидлашича геобиохимик энергияни биосферанинг этник сатҳида(ёки даражасида)ги таъсири пассионарлик ҳодисаси орқали намоён бўлади. Пассионарлик – ўзига хос хулқ-автор белгисидир. Бу шундай хулқ-авторки, белгиланган мақсад сари енгиб бўлмас, кучли интилиши ёрдамида ҳаракатланиши ва мақсадига эришиши учун нафақат ўз ҳаёти, балки келгуси наслининг ҳаётини ҳам аямасликдир. Пассионарлик психологик тарафдан ўз жонини сақлаш инстинктига қарама-қарши бўлган онг остининг импульсидир, деб таъкидлайди муаллиф.*

5. Пассионарлик импульси билан ўз-ўзини сақлаш инстинкти орасидаги нисбатдан келиб чиқсан холда Л.Н.Гумилев ўзига хос характерли хулқ-автор эгаларини уч турга бўлади: (а) пассионарлар; (б) муттаносиб кишилар; (в) субпассионарлар.

6. Статистикага кўра этносда “уйғун, муттаносиб” кишиларнинг сони пассионарлар ва субпассионарларга қараганда анча ортиқ. Лекин улар орасидаги миқдор ўзгаришлари этноснинг ёпиқ тизим сифатидаги геобиохимик холатини белгилайди ва келгусида улар сифат ўзгаришларига олиб келади. Пассионарликнинг кескинлашуви ва ўзгаришларнинг йўналиши этногенезнинг маълум бир даврини ёки этноснинг ёшини белгилайди. Муаллиф фикрича, бундай ўзгаришлар пассионар зарбалар натижасида вужудга келади ва пассионар популяцияларни дунёга келтиради. Вужудга келган пассионар популяцияларда шиддатли этногенез жараёнлари 130 – 160 йилдан кейин бир неча янги этник тизимлар гурӯҳини дунёга келтиради. Пассионар зарба вақтидан бошлаб 1500 йил ўтгач популяция-

дан пассионарлик белгилари бартараф этилиб, этногенез жараёни тугалланади: ё этнос тизим сифатида барбод бўлади, ёки ландшафт биоценози билан барқарор мувозанатда, гомеостаза холатида чексиз узоқ даврлар мавжуд бўлади [11].

Л.Н.Гумилевнинг таълимоти жуда заиф бўлсада, пассионарларнинг ўз халқининг тақдирида тутган ўрни ҳақидаги фикрлари асосга эга. Ҳар бир халқнинг тарихига назар ташласак, пассионарлар – халқ қаҳрамонлари ўз юрти, халқининг озодлиги, тараққиёти йўлида жонларини фидо қилганлар. Масалан, Широқ, Тўмарис, Спитамен, Амир Темур, маърифатчи-жадидлар шулар жумласидандир.

Ўз даврида Л.Н.Гумилев таълимоти жуда қаттиқ танқидга учраган. Шундан сўнг олим этнененез жараёнларининг давомийлигига ўзгаришилар киритган бўлсада, этнос табиати ҳақидаги фикрида қатъий туради. Этнос аъзоларининг «ўзимники» ва «бегоналар», «биз» ва «улар»ни қарама-қарши қўйиши этник мансубликни белгиловчи индикатор ҳисобланади: этнос ижтимоий ҳодиса эмас ва унинг худуд, тил каби белгилари йўқ, деб таъкидлайди олим [12]. Унинг фикрича ўзликни англаш ва руҳият ҳам этник бирлик элементларини боғловчи восита, комплементарликнинг асоси бўла олмайди. Л.Н.Гумилевнинг бу фикрларига эътиroz билдирган холда Биринчи президентимиз И.А. Каримовнинг қуйидаги фикрларини келтирамиз: “Маълумки, ўзликни англаш, миллий онг ва тафаккурнинг ифодаси, авлодлар ўртасидаги руҳий-маънавий боғлиқлик тил орқали намоён бўлади. Жамики эзгу фазилатлар инсон қалбига, аввало, она алласи, она тилининг бетакрор жозибаси билан сингади. Она тили бу миллатнинг руҳидир”[13].

Кўп холларда, олим, этнос тушунчасини давлат, хатто империя тушунчалари билан алмаштиради. Масалан, Рим империясининг қулаши билан қадимги рим этноси ҳам йўқолди, деб таъкидлайди олим. Аслида Рим империясининг ибтиносида рим халқи этник параметрларига кўра қадимги рим этносидан жиддий фарқ қилган, демак империянинг инқирози даврида қадимги рим этноси асосида рим халқи шаклланган. Рим халқи империя қулагандан сўнг ҳам «варварлар» билан ёнма-ён яшаган [14].

Л.Н.Гумилевнинг бу таълимоти совет этнографлари томонидан қаттиқ танқидга учраган. Кўпгина олимлар унинг пасионар назариясини умуман тан олмадилар, этносларнинг ижтимоий табиатини инкор этилишини қабул қилмадилар. Масалан, Ю.В. Бромлей фикрича, унинг аргументлари субъектив ва ишонсиздир. “Этноснинг асоси популяция эмас, балки ижтимоий омиллардир. Ижтимоий омилларгина этносларни вужудга келтиради, унга боғланган холда эса популяциялар пайдо бўлади” [15], деб ёзади олим.

Олимнинг таълимотини энг заиф томонларидан яна бири, фақат турли-туман ландшафтлар аралашган ҳудулардагина этносларнинг вужудга келиши мумкин, деб таъкидлашидир. У ўзининг «этник» харитасига Прибалтика, Кавказ, Ўрта Осиё ва Ҳиндистоннинг катта қисмини киритмаган [16]. Бу фикрни раддияси сифатида тарихий-этнографик ва археологик тадқиқотларнинг натижаларини келтириб утиш жоиздир. Ушбу маълумотлар кўрсатадики, милоддан олдинги V-III минг йилликларда Европоид ирқининг икки илк тури: шимолий илк Европоид (протоевропалик) ва жанубий Европоид (прото ўрта ер денгизлиқ) турлари

мавжуд бўлган. Масалан, ўлкамизнинг жанубида прото ўрта ер денгизлик ирқ тури дехқончилик (термачиликнинг навбатдаги босқичи) билан шуғулланган. Археологик топилмалар, яъни аҳолининг бош сүяклари Долихокран антропологик типга мансуб бўлиб, улар келгинди кўчманчи қабилалар билан аралашиб кетган [17]. Профессор С.Н.Турсуновнинг қайд этишича, милоддан олдинги II минг йилликда Ўрта Осиёда арий тилли (хиндорий) қабилалари яшаган ва уларга бақтрлар, тоҳарлар ҳам кирган. Мазкур жараён натижасида нафақат илк ибтидоий ижтимоий-сиёсий институтлар - қабила, уруғ, жамоа, балки “суғорма дехқончилик”нинг ривожланиши билан Ўрта Осиё ҳудудларида Бақтрия, Марғиёна, Сўғдиёна, Хоразм каби илк давлат уюшмалари шаклланади. Бу ҳудудларнинг аҳолиси турли манбаларда саклар, массагетлар, сўғдийлар, сакарауклар, апаспаклар, ассийлар каби номлар билан эслатилиб, улар ўртасида ўзаро этномаданий алоқалар мавжуд эди” [18].

Тарихий-этнографик ва археологик манбаларга таяниб хulosа қилиш мумкинки, минтақамизда яшаган туб аҳоли, қабилалар - сак, массагет, сакарауқ, апасандлар келгинди юэчжилар (тоҳарлар) Қанғ, Қорлуқ, Эфталит, Хионийлар билан аралашиб истиқомат қилганлар. Жанубий Сурхон ҳудудида милодий I-IV асрлар ҳукмронлик қилган Кушон ва VI-VII асрлардаги эфталитлар даврида ҳалқларнинг буюк кўчиши кучайиб, уларнинг бўлиниб кетиши, бирлашиши, яқинлашиши (интеграция), бирикиши (консолидация), аралашиб-қоришиб кетиши (ассимиляция) кучайди. Жанубий Сурхон ҳудудида VIII аср бошларида араблар, қорлуқийлар, XI-XV асрларда барлос, тархон, талоир, тулхичи, мунғул, қипчоқ, кўнғирот уруғларини келиб жойлашиши маҳаллий аҳоли билан аралашиб ўтрок ҳолга келиши кучаяди [19]. Демак, этноснинг шаклланиши ижтимоий, сиёсий, жуғрофий, демографик, юриш ва силжиш, хатто ассимиляциялашув жараёнлари билан боғлиқдир. Шу нуқтаи назардан қараганда “Этнос - кишилар социал гурухларининг тарихан вужудга келган, жамоа бўлиб яшашининг алоҳида шаклидир. Бундай жамоа табиий-тарихий йўл билан пайдо бўлади ва ривожланиди, улар жамоа гурухига кирадиган кишиларнинг хоҳиш иродасига алоқадор бўлмасдан, ўз-ўзини қайта тарбиялаш ҳисобига кўп асрлар яшайди”[20].

Ижтимоий муносабатлар кишини муайян гурухга тааллуқли қилиб қўяди. Барча кишилар жинсий, касбий, ёш, синфий, этник ва ҳоказо гурухларга мансублик хусусиятига эгадир. Ушбу хусусият туфайли киши ўзини бошқа бир кишига ёки гурухга қиёслай олади. Этник ўзлигини англаши туфайли эса киши ўзининг муайян этносга мансублигини, ушбу этноснинг тили, маданияти, менталитети ўзига тааллуқли эканини тан олади [21]. Сиёсатшунослик фанлари доктори В.Қўчқоровнинг ёзишича: “Миллий ўзликни англашни учта компонентдан иборат деб қараш лозим. Биринчиси, ўз-ўзини билиш, иккинчиси, ўз-ўзини қадрлаш, баҳолаш ва эмоционал холатини англаб етиш, учинчиси, миллий ўз-ўзини бошқаришидир” [22]. Шунинг учун у этник ўз-ўзини англашни этномаданий ва этнолингвистик белгилар билан чегараланиб қолмай, уни этносиёсий ҳаёт субъекти, сиёсий ижтимоий жараёнларга таъсир этувчи куч сифатида талқин этади. Этносиёсий ёндашиш нуқтаи назаридан бу тўғридир. “Миллий ўзликни

англаш,- деб ёзади В.Қўчкоров,- миллатнинг ижтимоий-сиёсий жараёнларга, жамият ва давлатни бошқаришга қаратилган ислоҳотларга, тараққиёт моделларига, жамиятнинг келажагига оид этносиёсий муносабатлар ҳамдир. Бу муносабатлар миллатнинг, фуқаролар ўз сиёсий-хуқуқий имкониятларини рўёбга чиқаришида, яъни ижтимоий-сиёсий ҳаётда ўз манфаатларини ҳимоя этувчи субъектлар сифатида қатнашишида намоён бўлади” [23].

В.Қўчкоров этник ўз-ўзини англашда ижтимоий-сиёсий институтлар, энг аввало давлатнинг роли катта эканлигини таъкидлайди. Этнос билан давлат уйғун шаклланган ва ривожланган бўлса-да, ижтимоий-сиёсий воқеликнинг ҳал қилувчи воситага айланиши, турли гуруҳлараро алоқаларни, ижтимоий муносабатларни, жамият ҳаётини бошқаришни ўз устига олиши туфайли давлат этноснинг ижтимоий онгига, маданий ривожига, ўз-ўзини англашга таъсир этувчи институтга айланди. Шунинг учун давлат билан боғлиқ ижтимоий сиёсий белгилар миллатнинг шаклланишида ҳал қилувчи роль ўйнаб келади. Айнан шулар қолган барча белгиларни ўз атрофида бирлаштиради, уларнинг яқинлаштирувчи, ҳамкорлик қилинишини умумий интилишини тезлаштиради ва таъминлайди... “Давлат этногенез ва миллий ўзликни англаш учун қандайдир ёт ташқи элемент эмас, балки улардаги энг муҳим, энг ижобий хислатларни ўзига жо этган ҳамда уларнинг ўзига хизмат қиласидан ижтимоий-сиёсий институтдир” [24].

Этнос ва миллат феноменларининг шаклланиши, кенг ижтимоий воқеликка айланиши тил, ёзув, урф-одат, маданият, ҳудуд, ҳатто рух билан боғлиқ жараёнларни, уларни ҳисобга олмаслик содда, примитив, демак, тор ёндашувни келтириб чиқаради. Этноснинг шаклланишида тил, ёзув, мулоқот, урф-одат ва анъаналар, маданият, ҳудуд муҳим аҳамиятга эга экани барча илмий адабиётларда қайд этилади. Бироқ уларда этноснинг ижтимоий-тариҳий бирлик сифатида шаклланишида муҳим рол ўйнаган “халқ руҳи”, “халқ қалби” тилга олинмайди. Қалб, рух нафақат индивидуал, шунингдек, гуруҳларга ва этносларга ҳам хос ҳодисадир [25].

Қайсибирижтимоий-тариҳийbosқичларниолмайлик, маълумбиргуруҳларнинг миллий манфаатларни ҳимоя қилиб чиққанига дуч келамиз. Гоҳо ушбу чиқишлилар ўша гуруҳ вакилларининг шахсий, ҳатто этноцентрик интилишлари, манфаатлари бўлиб кўриниши мумкин. Тариҳий шахсларнинг этнос ва ижтимоий, сиёсий, маданий ҳаётдаги ўрни уларнинг ўша чиқишлилари, интилишлари орқали баҳоланади. Масалан, Амир Темурнинг тарихдаги роли шўролар салтанати ва коммунистик мафкура ҳукмронлиги даврида унинг объектив чиқишлилари, сиёсий интилишлари нуқтаи назаридан эмас, балки коммунистик норма, синфиийлик позициядан туриб баҳоланганди.

Тарихни, айниқса буюк тарихий шахслар ҳаётини тайёр назарий, мафкуравий догма, қолиплар нуқтаи назаридан баҳолаш мудом уларнинг ижтимоий-тариҳий тараққиётдаги ўрнини нообъектив баҳолашга олиб келган. Буюк шахслар асосан зиддиятли хусусиятларга эга, бир қолипга сифмайдиган, тайёр догма билан ўлчаш қийин хатти-ҳаракатлар содир этишган. Ушбу зиддиятли томонларни

аниқлаб, уларнинг негизини объектив очиб бериш учун интеллектуал салоҳият ва илмий-маънавий жасорат ҳам талаб этилади. Айтмоқчи бўлган фикримиз шундаки, этнос манфаатлари ва қизиқишилари мавхум нарса эмас, у халқнинг иродаси, орзу-истаклари, санъати, дунёқараши ҳамда ушбу ижтимоий-маданий парадигмани ўзининг ижоди, ҳаёти ва экзистенциал борлиғига сингдирган, ҳаёти мазмунига айлантирган буюк шахсларда ўз ифодасини топади. Дарҳақиқат, машхур рус файласуфи Ф.М.Достоевский ўзининг “Ака-ука Карамазовлар” номли асарида тушунтирганидай, “Инсон борлигининг сири унинг фақат яшай олиш имкониятларида эмас, балки унинг нима учун яшashi кераклигидадир...”, “Агар инсон нима учун яшashi кераклигини билмаса, у ўзини ҳалок қилиши турган гап”, “шунингдек, нима учун яшаш кераклиги идеали албатта ялпи умумий (умумбашарий ҳақиқат) бўлиши керак, бу эса этносдан юқори турувчи идеал демакдир...” [26].

Миллатнинг ўзига хослиги унинг ички маънавий-руҳий оламини ташкил этувчи миллий эркинлик, ор-номус, қадр-қиммат, иззат-нафс, ғурур каби туйғуларда намоён бўлади. Агар уларга ташқаридан ёки бошқа миллатлар томонидан салбий таъсиrlар кўрсатилса, миллатлараро, ҳатто, давлатлараро муносабатларда зиддиятли ҳолатлар пайдо бўлади ва улар оғир мусибатларга олиб келиши мумкин.

Этнос, халқ ижтимоий борлиққа муносабатларини хуқуqlари орқали ифода этади. Демократик давлатларда айнан Конституция (Асосий Қонун) ва унга таяниб ишлаб чиқиладиган ва қабул қилинадиган қонунлар этноснинг ижтимоий борлиқдаги ўрнини, хуқуқ ва бурчларини белгилаб беради. Масалан, Ўзбекистон Республикасининг Конституциясига мувофиқ “Халқ давлат ҳокимиятининг бирдан-бир манбаидир” (7-модда); “Давлат халқ иродасини ифода этиб, унинг манфаатларига хизмат қиласди”; “Давлат органлари ва мансабдор шахслар жамият ва фуқаролар олдида маъсулдирлар” (2-модда). “Жамият ва давлат сиёсатининг энг муҳим масалалари халқ муҳокамасига тақдим этилади, умумий овозга (референдумга) кўйилади” (9-модда). “Ўзбекистон Республикасида ижтимоий ҳаёт сиёсий институтлар, мағкуралар ва фикрларнинг хилма-хиллиги асосида ривожланади” (12-модда) [27]. Мазкур моддаларда Ўзбекистон халқи ва фуқароларнинг ижтимоий, сиёсий, иқтисодий, маданий хуқуqlари, ушбу муносабатларнинг асосий принциплари белгилаб берилган. Мазкур хуқуqlар этноснинг миллатнинг узоқ ижтимоий-маданий ривожланиш жараёнида эришган ютуқлари квинтэссенциясидир.

Хуллас, биринчидан, халқни, миллатни ўз-ўзини англаш даражаси қачонки унда ўзи яшаётган худудини бошқалардан ҳимоя қила олса, ўз тамғаси ва байроғига эга бўлса, маълум бир урф-одатларга асосланиб маданий ҳаёт кечира бошласа, фаровонликни ўйлаб маҳсулот ишлаб чиқарса ва айирбошласа, илм эгаллашга, дунёни ўрганиш ва англашга эътибор қарата бошласа, кўпчиликни ўз изидан олиб бора оладиган йўлбошчига эга бўлсагина ҳақиқий миллат шаклланганлигини ҳисобга олиш мумкин. Шунингдек, миллат ўзида уруғчиликнинг энг ижобий томонларини, яъни курашувчанлик, ақллилик, иқтидорлилик, сезгирилик, фахм-

фаросатлилил, билимлилик, одоблилил, гўзалликка интилиш каби хусусиятларини сақлаб қоладики, бу миллатнинг салоҳияти, яъни унинг ички, асрлар давомида такомиллашиб, сайқалланиб келаётган менталитетида намоён бўлади. Шу билан биргаликда, унутмаслик лозимки, салбий томонлар ҳам ургунинг хусусиятлари сифатида сақланиб қолади ва улар ҳам руҳиятга, қолаверса менталитетга сингиб боради.

Демак, кишига маълум бир миллий-этник онга эга бўлиш хосдир. Бу онг унинг субъектив қарашларида намоён бўлса-да, у кишининг ихтиёри, хоҳиш-иродасидан ташқарида, объектив ижтимоий борлиқнинг, аслида миллий-этник борлиқнинг таъсирида шаклланади. Шунинг учун С.Отамурадов ҳам “миллатнинг абадийлигини унинг маънавий оламидан излаш зарур” [28], дея таъкидлайди. Тўғри, миллий-этник онг маълум бир ижтимоий омиллар таъсирида шаклланади. Онгнинг барча шаклларини моделлаштириш мумкин бўлганидек, миллий-этник онгни ҳам моделлаштириш, у ёки бу тарзда шакллантириш мумкин. Демак, миллатлараро муносабатлар, миллий-этник онг, ранг-баранг ижтимоий, тарихий, сиёсий, маънавий, иқтисодий, жўғрофий, ҳатто халқаро омиллар перманент таъсирининг маҳсулидир.

### **Фойдаланилган манба ва адабиётлар рўйхати:**

1. Широкогоров С. М. Этнос. Исследование основных принципов изменения этнических и этнографических явлений// Избранные работы и материалы. Владивосток: Изд-во Дальневост. гос. ун-та, 2001. – С. 203.
2. Фалсафа. Энциклопедик лугат. – Тошкент: “Ўзбекистон миллий энциклопедияси”. 2010 й. – Б.185.
3. Мамназаров Н. Мустақиллик ва миллий-этник жараёнлар. – Тошкент: ТМИ, 2004. – Б.7.
4. Бромлей Ю.В. Очерки теории этноса. – М.: “Наука”, 1983. – С.57-58; Жаббаров Исо. Ўзбек халқи этнографияси.-Т.: “Ўқитувчи”, 1994. – Б.17-18б.; Шониёзов К. Ўзбек халқининг шаклланиш жараёни. – Тошкент: “Шарқ”, 2001. -101-103б.
5. Широкогоров С.М. Место этнографии среди наук классификации этносов. – Владивосток, 1922. с. 10.
6. Van den Berghe P. Race and Ethnicity: Sociobiological Perspective// Ethnic and Racial Studies.Ibid. – Р. 407.
7. Man in society. A biosocial perspective. N. Y., 1975.Р. 65.
8. Гумелев Л.Н. Этносфера:История людей и история природы. – М. 1993. С. 540.
9. Там же. –С. 286.
10. Гумилев Л.Н. Этносфера. История людей и история природы. – М., 1993. С. 300-304.
11. Гумилев Л.Н. Этносфера. История людей и история природы. – М., 1993. С. 300-304.